

*P. Melanch.  
Shou*

*Wittenberg  
(o.a.)*

**Jb**

**4391**



Mel.-B. Nr. 785 Var. 1. M.

Do.

*[Handwritten signature]*



m  
p



Zerlegung etlicher  
vnchristlicher  
Artikel

Welche die Widerteuffer  
furgeben.



Phil. Melanthon.



Erklärung  
durch  
Herrn

Welche die  
Ausgaben



L268,16



# Verlegung etlicher Unchristlichen Artikel / wel- che die Widerteuffer furgeben.



**D**iese kurtze schrift  
ist gestellet zu vnterricht vnd  
erinnerung / der einfeltigen / da-  
mit sie sich desto vleissiger hü-  
ten / vnd desto besser zu bewa-  
ren wissen / fur der grausam-  
en Teufflischen sect der Widerteuffer / Vnd  
wiewol die gantze lere der Widerteuffer / vol  
irthumb vnd blindheit ist / vnd sie selb vn-  
gleich sind / also / das bey etlichen / als bey  
dem mördischen hauffen / so zu Münster inn  
Westvalen gewesen / noch mehr vnd grausam-  
er irthumb gefunden werden / so sind doch  
hie allein namhaftig erzelet / etliche artikel /  
welche die Widerteuffer fast alle zu gleich /  
erstlich furgaben / vnd von welcher wegen et-  
liche / newlich inn diesen landen / gestrafft  
sind / Vnd nach dem ire irthumb zum teil strei-  
ten wider das geistlich wesen / das die seel al-  
lein belanget / zum teil auch auffruhr leren /  
vnd zerstörung des leiblichen regiments / vnd  
der weltlichen stend vnd ordnung / so sind hie  
A ij etliche

etliche artikel vom leiblichen regiment erstlich  
erzelet / vnd ist solchs aus zweien vrsachen be-  
dacht.

Die erste vrsach ist / das die einfeltigen  
an diesen artikeln / welche leicht zu verstehen  
vnd zu richten sein / klar sehen vnd lernen mü-  
gen / das der Widerteuffer sect vnrecht / wider  
Gott / vnd aus dem Teuffel ist.

Denn wie Christus spricht / das die fal-  
schen Propheten inn schaffskleidern umb-  
zihen / vnd sind doch innwendig eitel reissende  
Wölffe / also auch die Widerteuffer / betrie-  
gen die einfeltigen / mit schein etlicher eigen  
ertichten wercke / nemlich / mit ertichter de-  
mut vnd anderer heuchley / damit sie den  
schalck decken / Aber den fromen vnd fürsich-  
tigen Christen ist not / der Widerteuffer geist /  
vnd eigne erfunden lere / das ist / das fürnes-  
meste vnd besondere heuptstück irer sect / zu er-  
forschen / vnd die schaffskleider auff decken /  
vnd das Wölffische hertze kennen vnd mer-  
cken lernen.

Nu ist die rechte vnd gewisse prob / all-  
zeit / aller secten vnd geister / das man sehe /  
ob sie öffentlich falsche vnd vnchristliche lere  
furgeben / vnd ernstlich fur nötig vnd gewis  
treiben vnd verteidigen / Wo diese makel ge-  
mercket vnd gefunden wird / da sollen die  
Christen fürsichtig sein / vnd scharf haben /  
vor solcher secten.

Also



Also leret Sanct Paulus die falschen geis-  
ter kennen. 1. Timoth. 4. vnd spricht / Sie  
werden speis vnd ehe verbieten / vnd aus sol-  
chen iren wercken / newe gerechtigkeit vnd vol-  
kommenheit machen / Der gleichen verbieten  
die Widerteuffer alle weltliche regiment / vnd  
gehorsam / eid vnd eigenthumb der güter / vnd  
zureissen die Ehe / welchs doch alles Gottes  
ordnung sind / vnd geben fur / das solche ire  
ertichte wercke / das rechte hohe Christliche  
wesen vnd heiligkeit sey / wie vor zeiten / die  
schendlichen ketzer Manichey auch gehalten  
haben / vnd gleich solches gespensst den leu-  
ten / mit der seltsamen / wunderlichen heilige-  
keit fur die augen gemacht / wie zu vnsern ze-  
iten die Widerteuffer.

Dieweil nu so viel furnemer artikel / vnd  
heuptstück inn der Widerteuffer lere / öffent-  
lich / vnd nicht geringe irthumb sind / denn  
daraus folget zerrüttung aller regiment / vnd  
dazu geistliche blindheit / so ist nicht zweifel /  
gedachte Widerteuffer sect ist vnrecht / vnd  
eitel verführung / durch den Teuffel erreget.

Darumb sollen die einfeltigen diese gro-  
be artikel ansehen / vnd betrachten / vnd ge-  
dencken / das solche grobe irthumb / iderman  
zu einer warnung furgestellet sind / das man  
sich wisse fur der Widerteuffer sect / deste mehr  
zu schewen vnd zu hüten / vnd allzeit das geists  
A iij lich

lich ange auffthun / vnd nicht achten / die fal-  
sche demut vnd andere heuchley / sondern den  
schandflecken / vnd die Teuffelische giff / da-  
runter verborgen / mercken / vnd dagegen klar  
Gottes wort halten / Also kan man sich fur  
des Teuffels listen bewaren.

Denn so man den lügenhafftigen geist /  
inn etlichen klaren vnd greifflichen artikeln /  
gemerckt vnd gespürt hat / so weis man / das  
man inn andern artikeln / dauon die einfeltigen  
weniger verstehen / nicht dem lügenhafftigen  
geist gienben sol / sondern aus Gottes wort /  
guten beständigen bericht / gewarten vnd  
lernen.

Dis ist die eine vrsach / darumb erstlich  
diese artikel vom weltlichen Regiment / erze-  
let sind / Die ander vrsach ist / das meniglich  
daraus verstehen möge / das die Oberkeit  
schuldig ist / mit ernster straff / der Widerteuf-  
fer sect zu weren / Denn das ist öffentlich vnd  
gantz gewis / das die Oberkeit schuldig ist /  
auffrur zu weren / weltlichen billichen ge-  
horsam vnd eidpflicht zu erhalten / den  
Ehstand zuschützen vnd zu handhaben /  
Nu streit dawider das heuptstück inn der  
Widerteuffer sect / wie ire artikel klar bewei-  
sen / Darumb ist on zweuel die Oberkeit schul-  
dig / solche schendliche / mörderische lere zu we-  
ren vnd zu straffen.

Denn

Denn wilche zerrüttung würde folgen/  
so diese irthumb vberhand nemen/ nemlich/  
das Christen kein andere Oberkeit haben sol-  
len/ denn allein die diener des Euangelij/  
Item/ das man der Oberkeit keinen eid schwe-  
ren sol/ Item/ das niemand sol eigenthumb  
haben/ sondern alle güter sollen inn gemein  
geben werden/ gleich als solt man satman  
inn allen Steten vnd Regimenten machen/  
Item/ das Eheleut mögen allein von wegen  
der vngleichheit im glauben von einander ge-  
hen/ wie wir denn auch etlich befunden ha-  
ben/ die jr weib vnd kind/ vngedrungen/ vnd  
one alle vrsach verlassen haben/ vnd aus die-  
ser schendlichen lere/ andere weiber zu sich ge-  
nommen/ Das ist ja leicht zuuerstehen/ das  
diese erzelete artikel eitel auffribur/ raub vnd  
mord/ dazu vnzucht vnd Ehebruch leren vnd  
pflantzen/ Dagegen ist kein zweifel/ das hie-  
rin der Oberkeit gebür/ ernstliche straff fur  
zunemen/ aus gehorsam/ den sie Gott schul-  
dig ist/ Gott zu lobe/ vnd den vnterthanen  
zu gut/ an leib vnd seel.

Vnd ob gleich etliche arme leute/ wels-  
che sonst nicht mutwillig vnd freuel sind/ inn  
diese irthumb fallen/ ist doch not/ der secten  
vnd dem samen zu weren/ Vnd sol die Ober-  
keit nicht leiden/ das solch gifftig geschmeis/  
weiter ausgebreitet werde.

So beweiset auch das schreckliche Ex-  
empel

empel zu Münster / das der Wüerteuffer des  
mut / vnd gedult eitel Teuffelische heuchley  
ist / Denn zu Münster war auch der anfang  
eitel grosse heiligkeit / Vnd lereten / Ein Christ  
solte das schwerd nicht führen / solt alles letz  
den / wolten auch erstlich keine Oberkeit / son  
dern allein Propheten vnd prediger haben /  
Darnach verriagten sie ire burger / vnd namen  
in die güter / als die Rauber / vnd machten ein  
König / vnd hatten fur / das Land herum  
mit dem schwerd vnter sich zu bringen / als  
mörder / Dazu trieben sie allerley vnzucht / Al  
so brach ir geist heraus / da er meinet rhaum  
zu haben / vnd gieng / wie man pflegt zu sa  
gen / Der Teuffel kan sich sonst gar verstel  
len vnd schon machen / allein die füß kan er  
nicht bergen / das ist / Entlich vnd im aus  
gang / kennet man des Teuffels verführung /  
Aber Christen sollen fürsichtig sein / vnd die li  
ste vñ der verführung warnemen / ehe sie gefan  
gen werden / Wie man nu zu Münster hat  
müssen weren vnd straffen / nach dem die Wi  
derteuffer öffentlichen Raub vnd mord / mit  
der that getrieben haben / also ist die Oberkeit  
schuldig / denen / so der gleichen auffhür  
sche Artikel halten vnd ausbreiten / vnd nicht  
dauon abstehen wollen / zu weren vnd sie zu  
straffen / als den jenigen / so das schwerd ge  
zückt haben / ob es gleich noch zum streich  
nicht komen ist. Das sey gnug dauon / wa  
rumb bedacht ist / die artikel vom leiblichen  
Regiment / erstlich zu erzelen. Es

Es sollen auch alle Christen bey diesen  
Artickeln betrachten/das des Teuffels macht  
schrecklich vnd gros ist/ das er inn solchen  
grogen artickeln/menschliche hertzen vnd ver-  
nunfft/so hart verblenden kan / das die aller  
gröbsten sund vnd schand / als auffrur / raub/  
vñ ehebruch/sol für die höhst heiligkeit geach-  
tet werden/Das ist ja kressziger irrthumb/  
welchen die welt mit irer grausamen sicher-  
heit/vnd verachtung des heiligen Göttlichen  
worts verdienet/wie Sanct Paulus spricht/  
vnd der welt/von wegen solcher verachtung  
drawet/ Dieser zorn vnd diese straff/ist alle-  
zeit inn der welt gar schrecklich gangen / vnd  
wird zu diesen letzten zeiten viel grösser sein /  
denn der trutz vnd verachtung Gottes / Fre-  
uel vnd furwitz wird grösser/darumb müssen  
grausam straffen folgen/ Derhalbē sollen wir  
dieses schrecklich Exempel der Widerteuffer  
ansehen / vnd diese/vnd der gleichen straff  
fürchten/vnd vns bessern / vnd mit rechtem  
ernst Gottes wort lernen vnd lieben/vnd inn  
Gottes forcht bitten/das er vns nicht wölle  
inn versuchung fallen lassen.

Es sollen sich auch die fromen trösten/  
vnd bedencken/das rechter glaube müsse an-  
fechtung haben/ Darumb sollen sie gerüst sein  
mit Gottes wort/wider alle ergernis / Vñ wie  
wol anfechtung inn der Christenheit zu allen  
zeiten inn dieser welt bleibet/so ist doch zu hof-  
fen durch

fen durch Gottes gnade/das dieses gift der  
Widerteußer/nicht lang bleiben wird/son-  
dern wird bald widerumb verschwinden/den  
der Widerteußer sect/ist nicht vngleich dem  
Manicheis/vnd sihet/als sey eben der Teuf-  
fel der Widerteußer meister/der vorzeiten die  
Manicheos erreget hat/welche auch solche  
falsche heiligkeit furgaben/mit verachtung  
aller weltlichen Regiment vnd Stende/vnd  
wolten kein schrift vnd lahr haben/sondern  
wolten allein halten/was sie der geist leret/  
gleich wie itzund die Widerteußer reden/ver-  
dampten auch den Ehestand/vnd trieben das  
neben grosse schandliche vnzucht/Wie nu die  
selbige zeit die Manichei/wiewol es ein gros  
geschmeis war/dennoch nach etlichen jarn  
vnter gangen/vnd gantz verloschen sind/Also  
ob gleich der Widerteußer wüten ein schreck-  
lich ansehen hat/wird es doch/als durch  
Gottes gnad zu hoffen/nicht mechtiger wer-  
den/vnd nicht lang bleiben. Nu wollen wir  
von bemelten artikeln reden/Aber zum ein-  
gang ist not diese stück hie zu mercken/vnd  
wol zu betrachten/daraus man auch der Wi-  
derteußer geist richten kan/nemlich/das die  
Widerteußer an dem furnemisten stück Christ-  
licher lahr feilen/Denn das sol furnemlich  
im Christlicher lahr/geprediget vnd getrieben  
werden/das Christlich gerechtigkeit vnd hei-  
ligkeit/sol im hertzen sein/rechter glaube vnd  
vertrauen auff Christum/ernstliche Gottes  
forche

Forcht vnd liebe / vnd sollen enfferlich leibliche Regiment vnd stende von Gott geordnet / fur Gottes gebot / vnd gute werck gehalten werden / darein Gott vnser leiblich leben gefasset habe / das wir darin den glauben gegen Gott vben / vnd andern gute Exempel furtragen / Auch das wir alle einander dienen / lieb erzeigen vnd beweisen / Dis sind die rechten hohen Gottes dienst / dauon vns das heilig Euangeliu prediget.

Aber menschlich hertz bleibet nicht gern bey diesen Gottes diensten / vnd bey Gottes wort / sondern sucht allezeit ander wege / vnd sonderlich sperret man die augen weit auff / wenn man nicht gewonliche werck / sondern etwas neues vnd besonders ertichtet hat / Diese heiligkeit thut menschlichem hertzen so sanfft / vnd wird so hoch gehalten / das auch im alten gesetz / die leut aus dieser falschen lust / hoffart vnd wolgefallen / inn eigen ertichten wercken / ire kinder opfferten vnd tödten / Darumb ist nicht wunder das itzund die Widerserteuffer vnd jr gleichen / ire werck so hoch achten vnd lieben / das sie sich mit grosser künheit inn tod geben / Denn also keren sie auch die lahr gantz vmb / sie wissen nichts von der heiligkeit im hertzen / vnd richten an / ein enfferliche neue heiligkeit / nemlich / zerstörung guter ordnung vnd sitten / der Regiment / des Eides / des Eigenthums vnd Ehestandes / Diese zerstörung vnd barbarey / sehen sie an /

B ij fur hohe

für hohe kostliche werck / nicht allein darumb  
das es etwas frembdes vnd vngewonlichs  
ist / sondern viel mehr darumb / das der Teufel  
welcher sie besessen hat / lust daran hat /  
die leut von Gottes wort vnd ordnung / auff  
ein andere strassen ab zuführen / vnd damit Abs  
götterey vnd allerley sund anzurichten.

Wieraus ist wol zu verstehen / aus wels  
chem grund der Widerteuffer irthumb vom  
leiblichen Regiment herkömpt / nemlich / das  
sie des heuptstücks inn Christlicher lere feilen /  
vnd wissen nicht / was Christlich gerechtiga  
keit ist / vnd meinen / es sey nur solche eusser  
liche vngewonliche weise / Dazu ist wol zu  
verstehen / das diese irthumb / vom leiblichen  
Regiment nicht allein eusserlich schaden thun /  
auffribur vnd zerstörung anrichten / welche  
doch billich mit grossen ernst sollen verhütet  
werden / sondern thun auch schaden im geist  
lichen wesen / denn zu dem / das mord vnd der  
gleichen sunden daraus folgen / vertunckeln sie  
auch den rechten verstand von Christlicher  
gerechtigkeit / vnd weisen die leute von Chris  
sto / vnd vom glauben / auff newe tolle werck /  
welche doch inn warheit eitel vnordnung / vera  
wüstung / schand vnd laster sind.

Schrecklich ist zu hören / das menscha  
liche hertzen so seer verblindet werden / Denn  
die Widerteuffer haben noch nicht hohers  
oder



oder anders erdacht / denn dieses / Man sol die  
Kinder nicht teuffen / vnd sol kein Oberkeit /  
kein Regiment haben / kein eidesplicht thun /  
nicht eigens behalten / vnd weiber nemen irer  
sect anhengig. Nu bedencke doch ein jder ver-  
nünfftiger diese stück selbs / welche heiligkeit  
kan dieses sein / Es ist ja öffentlich / das solchs  
nicht anders ist / denn ein grausame verwü-  
stung / Die kirche wollen sie zerreißen mit ver-  
bietung der Tauff / Die andern artikel sind ein  
zerstörung des leiblichen lebens / aller zucht  
vnd guten ordnung / die doch auch Gottes ge-  
bot vnd werck sind. Nu haben ja die Wider-  
teuffer kein andere heiligkeit / darumb sie sich  
von vns absondern / denn bemelte schöne ar-  
tikel / Was können sie denn für heiligkeit rüh-  
men? Warumb sollte sich ein Christ vor ihnen  
entsetzen? Ja ein Christ sol mercken / das der  
Widerteußer sect / eitel Teuffelischer betrug  
ist / Darumb sol er mütig sein im glauben / vnd  
den Teuffel getrost verachten / vnd im wider-  
stand thun / ein jder nach seinem beruff vnd  
ampt.

Das sey hie gnug / zu einer gemeinen  
erinnerung / auff die folgenden artikel / das die  
einfeltigen deste vleissiger betrachten / warin  
ein Christlich wesen eigentlich stehet / vnd se-  
hen / das die Widerteußer des rechten ziels  
weit feilen. Nu wollen wir die artikel nach ein-  
ander erzelen / vnd mit gutem grund verlegen.

B. iij Der

## Der erst artikel der Wirtteuffen.

Das Christen sollen vnd können nicht  
inn Oberkeit vnd ampt sein / welches das  
schwert füret.

Das dieser artikel vnrecht vnd vnchristlich sey / beweisen erstlich die Exempel inn der heiligen schrift / inn welchen zu sehen / das viel heiliger leute / Könige / Fürsten vnd amptleut gewesen sind / vnd das schwert nach irem stand vnd ampt gefüret / Christus lobet den Diebman / Matthej am. 8. vnd preiset seinen glauben so hoch / das er sprach / er hette nicht solchen glauben inn Israel gefunden / Dieser Diebman war ein Römischer Krieger / wie er selb anzeiget / vnd wird dennoch von Christo gepreiset / als ein grosser heilig vnd Gottes Kind. Der gleichen wird der Diebman gelobet / im buch von der Apostel geschicht / zu welchem Sanct Peter gesand wird. So sind Abraham / Joseph / Danid / Ezechias / Daniel / vnd viel andere heilige Christliche leut gewesen / vnd haben gleichwol das schwert gefüret / Item / inn Psalmen stehet von Christo / Könige werden in anbeten. Darans ist klar / das auch etliche Könige vnd Fürsten / Christen sein werden.

Sum

Zum andern Luce 3. Da die Krieger vnd  
amptleut/ Johannem den Teuffler fragten/  
was sie thun sollen/antwort er/sie sollen sich  
mit irem solt benügen lassen / vnd niemands  
gewalt oder vnrecht thun/ Damit ist das  
ampt bestettiget vnd gelobet/ Dieweil er sie  
im solt bleiben lefft/vnd spricht/sie sollen ire  
solde haben/ Den der solde gehört zum ampt.

Zum dritten/ der Widerteuffer gründli-  
che meinung ist diese/das die ordenlich straf-  
fe im Regiment/eitel sund vnd tyranney sey/  
denn die Rach sey den Christen verboten/wie  
geschrieben stehet Rom. 12. Ir solt euch  
nicht rechen/etc. Dieses ist der Widerteuffer  
grund/ Vnd solcher misverstand/gibet inen  
ursach / das sie ir gedult fur grosse heiligkeit  
rühmen/vnd dazu verdammen alle Oberkeit/  
Denn sie meinen/es müssen aller Christen wer-  
cke durchaus gleich sein. Das ist eitel blind-  
heit/ vnd kommet aus vnrechter deutung der  
schriff/ vnd aus dem misverstand / das sie  
nicht vnterscheid wissen/zwischen dem geistli-  
chen wesen im hertzen / vnd den eusserlichen  
stenden/welche sollen vnd müssen vngleiche  
werck haben/wie der man vnd das weib/vat-  
ter vnd kind/eusserlich vngleiche werck haben/  
vnd sol doch im hertzen einerley Gottes  
forcht/vnd glauben an Christum sein.

Darumb/so die Widerteuffer die sprüch  
anziehen/

anziehen / darinn die rach verboten wirt / sol  
man wissen darauff also zu antworten / nem-  
lich / das alle rach / ausser dem ampt verboten  
ist / Aber die rach im ampt / ist Gottes gebot /  
vnd ein heilig gut werck / Diesen vnterschied  
leret vns die heilig schrift selb / vnd ist nicht  
von menschen erticht.

Denn Paulus spricht von dem ampt /  
welches das schwerd füret / das es Gottes  
werck vnd ordnung sey / vnd das die Oberkeit  
Gottes dienerin sey / zur rach vnd straff der  
bösen / vnd zum schutz der fromen / Aus die-  
sen sprüchen ist klar / das diese rach im ampt /  
nicht sund ist / sondern Gottes gebot vnd ord-  
nung / vnd ein rechter heiliger Gottes dienst /  
Vnd dieweil das ampt nicht sund ist / sondern  
ein gut werck von Gott geordnet / so mögen  
die Christen solch ampt haben vnd gebranz-  
chen / wie andere Gottes gaben / als speis vnd  
tranc etc.

Ja sie müssen dieses ampt erhalten vnd  
nicht zerstören / denn das gesetz mus inn der  
welt bleiben / zur straff der bösen / wie Paulus  
spricht / Das gesetz ist vmb der vngerechten  
willen / Nu ist das ampt / welches das  
schwerd füret / ein stück des gesetztes.

Zum vierden / Gott gebent inn der heil-  
ligen schrift / man sol die Witfrawen vnd  
Waisen schützen / Dieses wird ja der Christli-  
chen Oberkeit



Oberkeit geprediget vnd gepoten / Darumb  
ist die straff Gottes gebot / Vnd ist Christliche  
Oberkeit schuldig / straff vnd rach / gegen den  
bösen zu vben.

Aus diesem allem ist klar / das die sprüch  
so die Rach verbieten / reden von den wercken /  
ausser dem ampt / Die andern sprüch / welche  
die Rach preisen vnd gebieten / reden von wer-  
cken im ampt / Vnd ist leicht zu verstehen / wa-  
rumb die werck im ampt vnd aussere dem ampt  
vngleich sein müssen / denn solches ist not zu  
erhaltung des fridens vnd der zucht / Denn  
wilche vnordnung vnd auffrur wurde fol-  
gen / so ein ieder vnterthan selb straffen / vnd  
selbs Richter sein wolt / Darumb hat Gott  
das Regiment wol vnd nützlich geordnet.

## Der ander Artikel.

Christen sollen keine andere Oberkeit  
haben / denn allein die diener des Euangelij.

Inn diesem artikel ist noch Klerer zu se-  
hen / aus welchem geist / der Widertenffer sect  
sey / denn zuuor / Denn hie wird zu gleich die  
Oberkeit verdampt / vnd der gehorsam zer-  
rissen / Vnd dieweil dieser artikel leicht zu ver-  
legen ist / bedarffs hie nicht viel wort / Allein  
sind die einfeltigen zu vermanen / das sie vleis-  
sig betrachten wollen / wie schrecklich dieser  
C artikel

artikel ist / Vnd das dieser artikel der Wider-  
teuffer auch falsch sey / beweiset Paulus Ro-  
ma. 13. da er spricht / Es ist nöttig vnterthan  
sein / nicht allein von wegen der straff / son-  
dern auch vmb des gewissens willen / Dieser  
spruch leret / das Gott für sund halten / vnd  
ernstlich straffen wird / so jmand nicht wil vn-  
terthan sein / Nu bindet dieser spruch alle men-  
schen auff erden / vnd stehet in niemands ge-  
walt / sich danon auszuziehen / Darumb  
müssen alle Christen / weltliche Oberkeit vnd  
regiment haben.

Zum andern ist öffentlich / das Gott die-  
se zwey ampt vnterschiedlich geordnet hat /  
das predigampt vnd weltliche Oberkeit / vnd  
hat befohlen / das die Christen vnter beiden  
emptern sein sollen / Darumb ist ein gewalts-  
cher irthumb diese empter inn einander men-  
gen / oder das eine auff heben vnd wegnemen /  
so sie doch beide Gottes ordnung vnd befehl  
sind / Denn es hat ja kein mensch macht /  
Gottes ordnung vmb zu stossen.

Das aber die Widerteuffer dagegen  
sprechen / die fromen bedürffen der straff  
nichts / darumb bedürffen sie auch der Ober-  
keit vnd weltlichen regiment nicht / ist eitel  
blindheit / Denn die fromen bedürffen der  
Oberkeit zum schutz / Item / die Oberkeit be-  
darff der gehorsamen vnd fromen Christen zu  
erhaltung der Regiment / Darumb wil vns  
Gott

Gott vnter dieser ordnung haben / vmb beider  
vrsach willen / nemlich / das wir schutz ha-  
ben / vnd dagegen das wir dienen mit leib vnd  
gut / in allem gehorsam vnd aller trew / vnd  
zu aller zeit im kriegs nöten vnd sonst / helffen /  
jeder nach seinem beruff / die Regiment / Friden  
vnd zucht zu erhalten / vnd den bösen zu we-  
ren / Zu diesem dienst gehören furnemlich die  
fromen Christen / Das alles leret Paulus  
Rom. 14. da er spricht / Wir sind der Oberkeit  
gehorsam / schos vnd ehr etc. schuldig / Wer  
nu dagegen leret / das Christen keine Oberkeit  
haben mögen / der leret / das man der Ober-  
keit jr gerechtigkeit / die sie hat an vnserm ge-  
horsam / entziehen möge / das ist öffentlich wi-  
der Paulum.

### Der dritte Artikel.

Christen sey verboten Eid schweren /  
vnd Eid schweren sey sund.

Dieser artikel ist auch ein zerstörung  
weltlicher Regiment vnd gericht / Denn re-  
giment vnd gericht / sind mit dem Eid gefas-  
set. Das aber die Christen mügen Eid schwe-  
ren / beweisen erstlich die Exempel / Denn S.  
Paulus schwerd selbs ein Eid mit klaren wor-  
ten. 2. Corinth. 1. Ich neme Gott zum zeugen /  
vber meine seele. Also schweret Sanct Paulus

C ij      offe

offt/ als Rom. 1. Philippenses. 1. Gott ist mein  
zeuge/ Vnd an andern mehr örten.

Hebreos. 6. Inn allen sachen / inn gericht-  
ten/ ist der Eid das end vnd bestetigung / Die  
wird der Eid inn den gerichtten gepreiset/ vnd  
für nötig angezogen / Darans folget / das  
nicht vnrecht ist Eid schweren/ denn bey den  
Christen müssen auch gericht vnd Richter  
bleiben/ wie droben vom Regiment vnd Ober-  
keit gesagt ist / Denn gericht sind ein fürne-  
mes stück der Regiment / vnd des ampts der  
Oberkeit.

Deutro. 5. Du solt bey dem namen des  
Herrn schweren/ Die wird im andern gebot  
befohlen / das man sol schweren/ doch allein  
bey Gottes namen / So nu geboten ist zu  
schweren / wo solchs gefordert wird / mus  
folgen/ das schweren nicht sund ist / sondern  
ein gut heilig werck / dadurch Gott geehret  
wird / so man recht vnd mit warheit schwe-  
ret/ vnd solchs nicht aus leichtfertigkeit thut/  
sondern dieweil es Gottes ehr / vnd die Ober-  
keit fordert.

Das aber die Widerteuffer dagegen an-  
zihen Matthej. 5. Du solt nicht schweren/ bey  
dem tempel etc. ist erstlich dieses zu antwor-  
ten/ das hie der Eid nicht verboten ist/ sondern  
dieses ist verboten/ das man die ehr / so Gott  
gebüret/ nicht den creaturn geben solle/ Gott  
ist allein der Herr/ der die hertzen kennet/ vnd  
vwarheit.



vnwarheit straffet/ Darumb sol Gottes na-  
men angezogen werden / vnd nicht der Tem-  
pel oder anders.

Zum andern ist zu antworten/ da Chri-  
stus spricht/ Wer rede sol sein/ ja/ ja etc.  
spricht er/ Wer rede/ damit zeiget er an/ das  
er den Eid verbent inn vnsern eigen vnd privat  
reden / nemlich / so vns der Richter oder die  
Oberkeit den Eid nicht auff leget / Item / so  
nicht Gottes ehr vnd ander leute seligkeit / vn-  
sers Eides bedarff/ Dagegen ist recht vnd  
nötig zu schweren/ so es die Oberkeit oder der  
richter fordert/ wie gesagt ist / Ebreos. 6. Der  
Eid ist inn gerichtten / das end / vnd besteti-  
gung etc.

### Der vierde artikel.

Christen sind schuldig ire güter inn ge-  
mein zu geben / vnd sollen nicht eigenthumb  
haben.

Dieser artikel locket dem losen hauffen/  
der nicht gern erbeit / vnd mehr verbrast  
denn er weis ehrlich zu erwerben / Das aber  
solche lere eitel reuberey vnd auffhur anrich-  
tet/ kan leichtlich ein jeder verstehen / Doch die  
einfeltigen zu verwarnen vnd zu vnterrichten/  
wollen wir aus Gottes wort vnd gebot kurtz-  
lich beweisen / das die Christen mügen eigen-  
thumb.

C iij

thumb.

thumb haben / Vnd das auffhant / vnd wider  
Gott ist / gebieten / die güter inn gemein zu ge-  
ben.

Zumersten / Dieser verstand ist den Chris-  
ten hoch von nöten / das sie wissen / das en-  
ferlich weltlich Regiment / Gottes ordnung  
sey / Vnd das Gott gefellig ist / das wir darin  
leben / vnd einander dienen / wie zuvor ange-  
zeigt ist / Nu ist eigenthumb haben der furne-  
mesten vnd nötigsten stück eines im Regiment /  
Daraus mus folgen / das ein Christ / solche  
ordnung gebrauchen vnd halten müge / ja  
wer diese ordnung auffheben vnd verbieten  
wil / vnd dagegen ein new regiment machen /  
vnd gebieten die güter auff ein gemeinen hauf-  
fen zu werffen / der vnterstehet sich Gottes  
ordnung zu reissen / vnd thut wider Gott.

Zum andern / Paulus leret i. Corinth. 7.  
Das die Christen kuffen vnd verkuffen mü-  
gen / darumb mügen sie eigenthumb vnd gü-  
ter haben / vnd zu Timotheo schreibt er / Ge-  
biet den reichen / das sie gern almosen geben /  
spricht nicht / das sie von gütern gehen sollen /  
sondern lesset sie inn iren gütern / vnd reich-  
thumb bleiben.

Zum dritten / Könige vnd Fürsten / müs-  
sen güter vnd eigenthumb haben / Nu leret die  
schrift klar / das etliche König vnd Fürsten sel-  
lig werden.

Zum

Zum vierden/ Prouerbiornm 3. Deine  
bronnen sollen hinaus fließen/ aber du solt  
herr darvber bleibē/ Da leret die heilig schrift/  
das ein jeder sol herr vber sein erbgut bleiben/  
Aber von den fruchten vnd nützingen sol man  
andern auch helffen / das meinet er / da er  
spricht/ Die brünlin sollen hinaus fließen/ Vñ  
ist warlich ein vernünfftigen Gottsfürchti-  
gen Christen ein trost / so er weis/ das Gott  
diese weltliche ordnung wolgefelt / das man  
inn gütern sitzet/ vnd narung sucht/ vnd das  
Gott derhalben seine ordnung zu schutzen/  
zur narung helffen wil/ etc. Das aber die Wi-  
derteuffer dagegen anziehen der Apostel Exem-  
pel/ da die Christen zu Jerusalem ire güter  
inn Gemein geben haben/ dieses ist nicht ein  
gebot/ Denn es sind auch die zeit/ viel Chri-  
sten gewesen/ die solche weis nicht gehalten  
haben / sondern sind inn iren gütern sitzent  
blieben/ wie man beweisen mag aus Paulo /  
2. Corinth. 9. Da auch Paulus leret/ das  
man niemand von seinen gütern bringen sol/  
sondern das almosen geben / stehen sol/ bey  
eins jeden guten willen. Die weil aber zu  
Jerusalem ein grosse verfolgung war / vnd  
teglich den Christen die güter genomen /  
vnd sie veriaget worden / war inen nützi-  
cher/ das sie die güter selbs verkaufften / vnd  
das gelt zur notturfft zu behalten / zu sa-  
menlegten/ Also haben sie dieses von wegen  
der verfolgung gethan/ vnd nicht/ das solch  
wercke

wercke eine newe heiligkeit were / wie etliche  
Mönche / Widerteuffer / vnd andere tolle heil-  
ligen / solche vngeberde vnd zerrüttung natür-  
licher ordnung vnd Regiment / für köstlich /  
himlisch wesen ansehen / vnd verstehen nicht  
das Christlich heiligkeit / im hertzen sein mus /  
vnd das Gott wol gefelt / das wir vns im euf-  
serlichen leben / nach gewonlichen vnd or-  
denlichen Regimenten halten.

## Der funfft artikel.

So im Ehestand die ein person recht  
glaubig ist / vnd die ander Eheliche person /  
nicht recht glaubig / so sey solcher Ehestand  
hurerey / vnd müge die recht glaubige person /  
die ander verlassen / allein des glaubens hal-  
ben / vnd ein andere freien.

Dieser artikel / sol billich vernünfftige  
vnd züchtige leute bewegen / das sie der Wi-  
derteuffer sect ernstlich vnd von hertzen feind  
werden / Denn es ist schrecklich zu hören / das  
sie rechten Ehestand schenden vnd zerreißen.

Das aber dieser artikel der Widerteuffer  
vnrecht sey / ist gantz klar aus Paulo. 1. Corin. 7.  
da Paulus eigentlich diese frage handelt /  
Ob die glaubigen vnd vnglaubigen im Ehe-  
stand bey einander bleiben solten / Vnd be-  
schleusst

schlenst / das sie sollen beieinander bleiben /  
Vnd leret dabey / das solche Ehe / dem gleybi-  
gen / ein rechte / heilige / vnd Gott gefellige  
Ehe sey / Darumb spricht er / Die vngleybige  
person wird geheiligt / durch die gleybige /  
das ist / die Theliche beywonung dieser per-  
son / wird heilig / das ist / Gott gefellig / vnd  
ist nicht sund / Denn also sol man das wort /  
heilig / an diesem ort verstehen / wie Paulus  
sonst auch spricht / Die speis wird geheiligt /  
das ist / Es ist nicht sund / die speis gebrau-  
chen / die Gott geschaffen hat.

Also leret Sanct Paul beide stück / nem-  
lich / das erste / das die gleybige person bey der  
vngleybigen bleiben sol / vnd zu bleiben schul-  
dig ist / wo sie nicht von der vngleybigen / mut-  
willig verlassen wird / Das ander / das zwisch-  
ender rechtgleybigen person / vñ der vngleybi-  
gen ein rechte Ehe ist / also das die rechtgleybi-  
ge person mit gutem gewissen inn solcher Ehe /  
als inn einem Gott gefelligem heiligen stand  
sein kan / vnd darin zu bleiben schuldig ist /  
Denn Sanct Paul spricht deutlich / das diese  
beywonung heilig sey / Darumb ist es eitel  
Teuffel spiel / das die Widerteuffer solche Ehe  
hurerey schelden / vnd zerreißen.

Vnd wiewol die Widerteuffer gantz vn-  
verschampt sind / vnd ertichten lügen vnd glo-  
sen / wie sie wollen / so kan doch ein ider ver-  
D nünfftiger

nünfftiger leichtlich verstehen / das dieses w'e  
wir gesagt haben / grüntlich vnd eigentlich S.  
Paulus meinung ist / Dagegen haben in die  
Widertensffer ein eigen sprichwort erdicht /  
Ein glaub / ein liebe / Das denten sie also / sie  
seien den jenigen / so nicht jres glaubens sind /  
nicht schuldig das Ehegelübb zu halten /  
Wenn dieses sprichwort also zu denten were /  
das man niemand trewe zu halten / oder lieb  
zu erzeigen schuldig sein solt / der vns im glau  
ben vngleich ist / so kont man leichtlich alle hen  
del / verpflichtungen / vnd schuld ausleschen /  
Christus hat geboten / wir sollen auch vnser  
feind lieb haben / welche vns vervolgen / vnd  
offentlich im glauben vngleich sein / Wieviel  
mehr sollen Eheleut einander trewe sein / etc.

Das wer besser gedent / das ein jeder  
inn seinem eigen hertzen / ein glauben / vnd ein  
lieb / haben sol gegen Gott / das ist / das er al  
lein an Gott glauben / sein vertrauen allein zu  
Gott haben / Gott allein vber alle ding lieben  
sol / vnd sich nicht von Gott abwenden lassen /  
durch wollust / ehr / gelt oder gut / etc. Die sel  
bige lieb zu Gott / bringet auch mit sich den ge  
horsam inn allen wercken / die Gott zu jedem  
stand geboten hat.

Die

# Don der Kinder tauff.

Die Widerteuffer halten / das die Kinder  
tauff vnrecht sey.

Nu bedenck hie ein jeder Gotforchtiger  
mensch zum ersten / wie schrecklich ist / ein gros  
sen teil des menschlichen geschlechts / nicht al  
lein inn ein vngewissen stand aussen der Christ  
lichen kirchen werffen / sondern von Gottes  
ordnung vnd gnaden zur verdammnis reissen.  
Zum andern / Welche zerrüttung wolte folgen  
so nu vnter vns selb zween hauffen / ein ge  
tauffter vnd vngetauffter auffwachsen solten /  
Vnd so die tauff zum grössern teil abgethan  
were / wurde darnach öffentlich Weidnisch  
wesen einreissen / Dazu wolte im der Teuffel  
gern ein wege machen . Darumb sollen alle  
fromen Christen wol vnterricht sein / von der  
Kinder tauff / vnd sich selb mit gutem grund  
wissen zu trösten vnd zu stercken / das sie die  
Kinder tauff treulich erhalten / Gott zu ehr /  
den lieben Kindern zur seligkeit / vnd vns selb  
zum trost / Denn es ist fromen Christen gantz  
tröstlich / wenn sie gnugsam vnterricht sind /  
das die Kinder gewislich durch die tauff / Got  
tes Kinder / vnd selig werden / Darumb wollen  
wir bewaisen / das die Kinder tauff recht vnd  
nöttig sey / vnd ist dieses der erst grund.

D ij Das

Das ist gewis vnd vnlaugbar / das die  
gnad Christi / vergebung der sund vnd selig-  
keit / im Euangelio verheissen / auch den kin-  
dern gehört / wie den Christus spricht / Lasset  
die kinder zu mir komen / solcher ist das himel  
reich.

Nu ist auffer der Christlichen kirchen /  
das ist / wo nicht Sacrament vnd Gottes  
wort ist / kein seligkeit / Darumb müssen die  
kinder der Christlichen kirchen eingeleibet vnd  
der selbigen glieder werden / vnd mus in durch  
das Sacrament solche gnad gereicht wer-  
den / Denn Gott hat das eusserlich ampt also  
geordnet vnd beuolhen / das dadurch sol ver-  
gebung der sunden / allen / inn der kirchen aus-  
geteilet werden / Das alles ist öffentlich vnd  
gewis / Denn die Widerteußer können nimer  
mehr beweisen / das seligkeit sey auffer der  
Christlichen kirchen / das ist / wo nicht Sacra-  
ment vnd Gottes wort ist.

Der ander grund / Die kinder sollen vnd  
müssen glieder der Christlichen kirchen sein /  
sollen sie anders selig werden / wie itzund ge-  
sagt ist / Nu leret Sanct Paulus / das Christ-  
lich kirch / sey die versammlung so durch den hei-  
ligen geist vnd tauff gereiniget ist / Darumb  
kan niemand on tauff / ja mit verachtung der  
tauff / ein glied der Christlichen kirchen sein /  
Also leret auch Christus Johan 3. Niemand  
kan eingehen inn das himelreich / er werde den  
wider =



widergebom durch das wasser vnd den heiligen geist/ Die fasset ja Christus alle menschen auff erden/ jung vnd alt/ vnd saget nemlich vom wasser/ Darumb so die Widerteuffer fragen / wo geboten sey / die kinder zu teuffen/ sollen wir vns an diesen spruch halten / vnd wissen / das da geboten ist/ Denn Christus spricht/ Niemand kan inn das himelreich komen / er werde denn wider geporn/ durch das wasser vnd heiligen geist/ Denn das ampt/ mit dem wasserteuffen / ist der Kirchen beuohlen.

Das sie auch dagegen das wasser vnd ensserlich zeichen verachten/ aus hoher weisheit vnd heiligkeit / ist ires meisters des Teuffels klugheit/ der/ als ein hoffertiger geist/ vnd Gottes feind / die elenden menschen treibet / Gottes wort vnd ordnung zu spotten / Aber die Christen solley wissen / das inn solchen ensserlichen zeichen/ Gottes wort/ befehl vnd ordnung ist/ Darumb mus man die zeichen gebrauchen/ vnd wircket Gott mit seiner ordnung / wie er verheissen hat / Derhalben spricht S. Paulus/ das die Kirch durch die tauff gereiniget werde/ Item/ das wir durch die tauff wider geporn werden / welches alles darumb geredt ist/ das wir gewislich glauben sollen/ das Gott mit den zeichen wircke.

Das aber die Widerteuffer dagegen sagen/ die kinder haben kein glauben / ist ein  
D iij menschlicher

menschlicher gedanck / vnd ist nicht war /  
Denn das ist gewis / das Gott inn den Kin-  
dern / nach irer mas wircket / so sie durch die  
Tauff fur inn bracht werden / Denn nie-  
mand wird on Gütlich wirkung vnd wider-  
gepurt selig / Johannis 3. Nu ist gewis das  
die Kinder / so der Christenheit glider sind / se-  
lig werden / So volget / das war sein mus / das  
Gott inn jnen wircket.

Der dritt grund / Die Kinder haben sun-  
de an jnen / nemlich / die Erbsund / Derhal-  
ben bedürffen sie vergebung der sunden / wel-  
che jnen durch die Tauff wird mitgeteilet /  
Denn diese vergebung / vnd das eusserlich ampt  
mus vnterschied machen / zwischen den Kin-  
dern / welche selig werden / vnd den andern /  
Aber hie kan man der Widerteuffer geist recht  
mercken / denn sie halten vnd leren / die Kin-  
der haben kein sund an in / vnd das erbsund  
nicht sund sey / Item / das die angeborne bö-  
se lust im menschen nicht sund sey / Wenn  
man ein lügen ferben wil / so bedarff man  
viel mehr lügen darzu / Also hie / so die Wider-  
teuffer die Tauff wöllen umbstossen / ertich-  
ten sie viel schrecklicher grewlicher lügen dar-  
zu / Vnd bedencke ein jeder / der Widerteuffer  
heiligkeit / sie suchen newe eusserliche vnorden-  
liche werck / damit wöllen sie heilig sein / vnd  
sind im hertzen so blind / das sie ire eigen böse  
lust nicht fur sund halten / verachten Tauff  
vnd

vnd eufferlich Gottes wort / vnd halten nicht  
das man da Gott suchen sol / vñ das Gott mit  
wircke / Darumb wissen sie nicht was glaub  
ist / vnd suchen frembde werck / oder wols  
len besondere erlenchtung haben / auffer / vnd  
one Gottes wort / Das ist eitel blindheit / ir  
thumb vnd Teuffels gespenst / Vnd sind eben  
die heiligen lente / dauon Paulus spricht / das  
sie toll sind / vnd prangen hoch daher / vnd rhu  
men ding / da sie nichts von wissen. Dieses  
alles / sollen Christen wol betrachten / damit  
sie die falschen geister vnd irwusch kennen  
lernen / sie zu fliehen vnd zu meiden.

Das aber die Kinder erbsund mit sich  
bringen / Vnd das angeborne böse lust sund  
sey / leret S. Paul gantz deutlich an vielen or  
ten / Roma. 5. Durch Adams vbertretung /  
sind wir alle sundig worden / Romanos 7.  
nennet er die angeborne lust im menschen /  
sund / die inn vns wonet / vnd Roma. 8. spricht  
er / Die lust im fleisch / ist has wider Gott / das  
ist ja hart vnd deutlich gnug geredt / Item /  
Eph. 2. Wir sind geborn Kinder des zorns /  
das ist sundig vnd verdampt.

Vnd inn Summa / es ist allezeit inn der  
Christenheit dieser verstand blieben / das erb  
sund warhafftiglich sund sey / vnd das diesel  
bige den Kindern durch die tauff vergeben wer  
de / vnd damit ichs hie nicht lange mach / denn  
alle guthertzigen vnd verstendigen / klar gnug  
sehen

sehen / das die Widerteußer Gottes wort  
gantz mütwilliglich hie verlaugnen / wil ich  
noch nur ein vrsach setzen / daraus auch klar  
zu vernemen / das an den kindern Sünd ist /  
welche inen wird durch die tauff vergeben /  
Denn alle Christen müssen bekennen / das  
Christus nicht allein der alten / sondern auch  
der kinder erlöser ist / So sie nu Christus be-  
dürffen / als des erlösers / ist one zweifel sünd  
an inen / Dieweil denn gnugsam bewisen ist /  
das sünd an den kindern ist / sollen sie verge-  
bung erlangen / so mus das eusserlich ampt  
dazu komen / sonst were kein vnterschied / vnd  
keine kirch.

Der vierd grund / Tauff vnd Beschnei-  
dung / bedeuten beide / wie Paulus leret / gnad  
vnd vergabung der sünden / Nu ist die beschnei-  
dung der kinder recht / vnd nötig gewesen / vnd  
sind dadurch die kinder Abrahe / von Gott  
angenomen / vnd Gottes kinder worden /  
Darumb müsse auch bey vns ein zeichen  
sein / welches vnterschied machet / zwischen  
Gottes kindern / vnd den verdampften.

Der fünffte grund / Der Herr Christus  
hat gantz ein tröstlichen spruch gered von den  
kindern / Des vaters wil ist nicht / das dieser  
kinder eins verloren werde / Diese wort sind  
von den beschnitten kindern gered / Also müs-  
sen sie auch bey vns / von den jenigen kindern  
allein verstanden werden / welche glider sind  
der

der Kirchen/ Denn sie können nicht von Hei-  
den vnd Türcken verstanden werden / Die-  
weil kein seligkeit außser der Kirchen ist / das  
ist/ wo nicht Gottes wort vnd Sacrament  
ist/ Darumb sollen alle fromen Christen trost  
vnd freud daran haben / das sie wissen/ das  
denn ire Kinder gewislich Gottes Kinder sind/  
so sie durch die Tauff sind glieder der Kirchen  
worden/ vnd von Gott angenommen/ Derwe-  
gen ist ja die Kindertauff ein lieblicher hoher  
trost / vnd das wir beschliessen / wenn alle  
Widerteuffer / alle ire weisheit/ heiligkeit vnd  
marter zu samen bringen / so können sie den-  
noch keinen menschen gewis machen / das  
Kinder außser der Kirchen / als Türckische Kin-  
der/ selig werden/ Darumb ist jr lar eitel gantz  
ungewis ding / vnd ertichter Teuffelischer  
betrug.

Wie wol wir aber aus Göttlicher schrift  
guten beständigen grund angezeigt haben / so  
wollen wir doch dieses auch erinnern/ das die  
Kinder tauff nicht ein new ding ist / sondern ist  
auch inn der Altisten reinen Kirchen gewesen/  
welches nicht zu verachten ist / Denn was zur  
seligkeit not ist/ das mus zuvor inn der Chri-  
stenheit/ vnd sonderlich die zeit / da die lar rei-  
ner gewesen ist/ auch bekant sein / So nu die  
Kinder Tauff vnrecht / vnd die Widertauff  
zur seligkeit not were / so muste solchs doch  
etwa ein zeugnis vom heiligen geist inn der  
Kirchen haben/ Dieweil nu der Widerteuffer  
R lahr

lahr gantz ein eigen newe gedicht ist / one ein-  
ge Exempel oder zeugnis der alten heiligen  
Kirchen / sollen billich vernünfftige Christen  
ein schewe vor der Widertauff haben / Denn  
es gilt nicht also schertzen / inn der Christlichen  
lahr on Gottes wort vnd einige bewerte Ex-  
empel ein newe lahr einfüren / ja wider Got-  
tes wort / vnd wider alle Exempel / gantzer ge-  
meiner Christenheit von anfang her. Das  
ist grausam vermessenheit vnd künheit / da-  
fur Gott vns gnediglich behüten wölle /  
Denn es ist Teufflische verachtung Gottes /  
vnd ist des Antichrist eigenschafft / wie Daniel  
vnd Paulus sagen / Wie denn der Papst vnd  
die Mönich viel schrecklicher misbreuch / mit  
gleicher künheit inn die Christenheit / on vnd  
wider Gottes wort vnd alte Exempel / ein-  
gefüret habē / als ire todten Mes / verbietung  
der Ehe / vnd ander mehr stück / Vnd wiewol  
die Widerteußer vnter solchen stücken / auch  
wöllen die Kindertauff zelen / so irren sie doch  
Denn die Kindertauff hat Gottes wort / vnd  
der Eltesten reinen Kirchen Exempel / Denn  
Christus spricht / Niemand kan eingehen inn  
das himelreich / er werde denn widergeborn /  
durch das wasser / vnd den heiligen geist / nu-  
ist dieses eusserlich ampt / mit wasser teuffen /  
der Kirchen beuolhen / darumb sol die Kirch  
sollichs allen mitteilen / Darzu hat die Kinder-  
tauff Exempel aus der Eltesten Christen-  
heit.

Denn

Denn Origenes spricht mit klaren worten  
in seiner auslegung / Romanos 5. Das  
die Christenheit derhalben die ordnung von  
den Aposteln empfangen habe / die Kinder zu  
tauffen / die weil angeboren sund an kindern ist /  
welche durch das wasser / vnd den heiligen  
geist abgewaschen werde.

So schreibet Cyprianus zu Sido / ein  
guten vnterricht / das die kirch nicht sol die  
Kinder von der tauff vnd gnaden ausschlies-  
sen / sondern sey schuldig inen die tauff mitzu-  
teilen / Denn so viel an jr ist / ist sie schuldig /  
allen menschen jung vnd alt / jr ampt mitzutei-  
len / Vnd saget dabey deutlich / das die Kinder  
derhalben der tauff bedürffen / das sie durch  
Gottes gnad vnd werck in der tauff erlan-  
gen vergebung der Erbsund. Dergleichen  
sind viel sprüch in Augustino / welcher auch  
saget / das diese ordnung in der gantzen kir-  
chen gehalten werde / als sey sie von den Apo-  
steln herkommen.

Diese sprüch haben wir erzelet / damit  
die einfeltigen sich nicht betriegen lassen /  
durch etliche lügenhafftige geist / welche den  
vngelarten einbilden / als solten die alten heili-  
gen / die Kindertauff nicht gehalten haben /  
wie denn etliche zu Münster geschrieben ha-  
ben / dazu / das man bedenck / das in der  
Christlichen kirchen / wider solche alte Exem-  
pel / newe lere one Gottes wort einführen / gros-

E ij se ver

se vermessenheit / frecheit / vnd dazu irthumb  
ist.

Wer diese erzelte vrsachen vleissig vnd  
wol betracht / der kan durch Gottes gnad / sei-  
nen glauben wol stercken / vnd sich fur dem  
vnchristlichen irthumb der Widerteuffler /  
wol bewaren / Denn wir sollen ja wissen / das  
der glaube anfechtung leiden wird / vnd sol  
durch Gotes wort gestercket werde / Darumb  
sollen wir wacker vnd vorsichtig sein / das vns  
der Teuffel nicht von Gottes wort fur / auff  
eigne gedancken / wie den Widerteufflern ge-  
schihet / Denn das ist der grund vnd anfang  
der verführung inn den Widerteufflern / das sie  
Gottes wort verachten / vnd fallen auff eigen  
gedancken / vnd haben solch gros wolgefal-  
len vnd lust an den selbigen / das sie surgeben /  
es sey der heilig geist / vnd faren denn fort vnd  
lestern Gott / sagen / man sol das eusserlich  
wort vnd schrift nicht achten / sondern man  
soldem geist folgen / Wenn dieser eingang  
vnd diese thur offen ist / das ein ider nach sei-  
nem geist / vnd nicht nach Gottes wort rich-  
ten sol / ach Gott / wilch greulich ding wird  
folgen / wie denn das Exempel zu Münster  
bewiesen hat / So haben vnser viel von den  
itzt gestrafften Widerteufflern gehört / wenn  
sie mit klarer schrift vberwunden waren /  
sagten sie entlich / der Geist leret sie also .

Der halben ist hoch von nöten / das  
man



man drauff achtung habe / das wir vns nicht  
von Gottes wort zu eigen gedancken abfüren  
lassen / sondern wissen / das der heilig geist  
nicht one Gottes wort wircket / sondern durch  
Gottes wort / vnd das man Gott bey seinem  
wort erkennen vnd fassen sol vnd mus / wie  
Paulus spricht / Der glaube kömpt aus dem  
gehör / das ist / aus der predig / oder aus dem  
eusserlichen wort / Diese ordnung helt Gott /  
vnd zerreißt sie nicht / darumb ist verachtung  
des eusserlichen worts / vnd der schrift / eitel  
Gotteslesterung / welche auch die weltliche  
Oberkeit / zu straffen schuldig ist / laut des an-  
dern gebots / darin befohlen ist / das man  
Gottslesterung straffen sol / Dazu sihet man /  
was inn eusserlichem leben fur schand vnd  
laster folgen würde / so ein jder nach seinen ge-  
dancken leren vnd leben wolt / Darumb der  
weise König Salomon spricht / wenn die  
rechte predig weg ist / so wird das volck vnd  
Regiment zustrawet / Derhalben sol die welt-  
liche Oberkeit auch hie wachen / vnd diese  
Gottslesterung nicht dulden / nemlich / offent-  
liche verachtung der schrift vnd des eusserli-  
chen worts / sondern mit ernst weren vnd straf-  
fen / vnd sonderlich sollen alle Christen / solche  
verachtung der schrift / gewislich fur Teuff-  
lich halten / vnd wissen / das es eben der schlan-  
gen rede im Paradis ist zu Eva.

Es haben auch die Widerteuffer mehr  
E iij irthumb

irthumb von beiden Sacramenten / vnd von  
irem brauch / dazu von andern mehr artikeln  
dauon andre zuuor auch geschrieben / vnd je-  
tzund alle zuhandeln / die zeit nicht leidet / Vnd  
ist dieser vnterricht furnemlich darumb ge-  
stellet / das die einfeltigen / dadurch an etlichen  
leichten artikeln / wolten den geist inn den Wi-  
derteuffern / richten vnd kennen lernen / vñ sich  
beste mehr wissen zu hüten / Bitten derhalben  
die Christlichen Prediger / wöllen diese vnd  
andere artickel weiter erkleren / vnd die leut offte  
vnd mit vleis inn solchen fabrlichen zeiten vn-  
terrachten / wie sie schuldig sind / vnd Gott müs-  
sen rechenschafft geben / so sie diesen irthumb  
ben nicht mit ernst widerstand thun.

Es haben auch die Widerteuffer etli-  
che geberde / damit sie mehr die leut bewegen  
denn mit der lar / nemlich / das sie viel prechti-  
ger vnd frembder wort gebrauchen / vnd ihu  
men hohe erleuchtungen / welches doch al-  
les erlogen ist / wie die erfahrung offte bewisen  
hat / Item / das sie grosse demut surgeben /  
bey den jenigen / welche sie loben / Item / das  
grosse brüderliche trewe scheint / das sie ire  
güter inn gemein geben / Item / das sie im lei-  
den grosse gedult erzeigen / vnd mit grosser kün-  
heit vnd trotz inn todt gehen / Nu ist nicht  
wunder / das solche geberde jemand bewegen /  
Aber ein Christ sol Gottes wort / hoch vnd  
weit vber allen schein inn eusserlichen geber-  
den /

den heben vnd setzen / vnd sol wissen / das man  
geistliche sach nach Gottes wort / vnd nicht  
anders richten sol / Können doch die Heiden  
auch freuenlich vnd freidiglich inn tod lauffen /  
Denn der Teuffel kan wol die seinen ver-  
blenden / das sie ire sund vnd straff nicht fü-  
len / Christen fülen sund vnd angst / vnd vber-  
winden sie mit glauben / darumb / dieweil sie  
streitten / scheint schwachheit an inen / Der-  
halben / ob gleich die Widerteufler trotzlich  
inn tod lauffen / sollen wir darumb nicht von  
Gottes wort abfallen / sondern bedencken /  
das rechten glauben im hertzen zu erhalten /  
auch ein ernst vnd kampff / wider allerley er-  
gernis dazu gehört. Unser Herr Christus  
wolle vns gnediglich bewaren / vor allen  
irthumb / vnd inn rechtem glau-  
ben / vnd rechtem gehor-  
sam erhalten /  
Amen.

Bedruckt zu Wittenberg  
durch Georgen  
Kham.

Faint, illegible text, likely bleed-through from the reverse side of the page.

Geordrick zu ...  
Dunck ...  
Klar.









JB 4391

(x 227 0055)

Ac. 251  
m







B.I.G.

Farbkarte #13

# Zerlegung etlicher vnchristlicher Artikel

Welche die Widerteuffer  
furgeben.



Phil. Melanthon.

